

Pronta da s'adattar a las regiuns

La regenza grischuna è pronta d'adattar il concept dals sviluppaders regionalis

■ (anr/ac) La regenza grischuna è pronta da far concessiuns a ses concept per finanziar ils sviluppaders regionalis. Per quel motiv ha ella expligà sia voluntad dad acceptar l'incumbensa dal deputà Markus Clavadetscher (pld Tumleastga) inoltrada a chascun da la sessiun dal cussegl grond da l'october passà. Perquai che la confederaziun ha reduci sias contribuziuns a fond perdu al svilup economic regional è la regenza grischuna stada sfurzada da reponderar sia cunfinanziaziun dals sviluppaders regionalis. En la resposta a l'incumbensa da Markus Clavadetscher (pld Tumleastga) scriva la regenza grischuna dad esser stada da l'avis il settember 2015 che la confederaziun contribueschia in milliun francs. A disposiziun stettian ussa dentant sulet 875 000 francs. Uschia na tanschian las finanzas betg per pussibilitar a tut las regiuns politicis grischunas in sviluppader regional. La regenza saja sa decidida per sviluppaders regionalis en incarica cumplaina tranter 80 e 100 pertschient cun in intschess da lavur sur pliras regiuns. Il nov sistem da sulet engaschar sviluppaders regionalis a temp da lavur cumplain cun responsabladad per pliras regiuns nun è fruntà sin cumplaina chaipientscha. En scadin cas betg tar il deputà Markus Clavadetscher che ha inoltrà ina incumbensa a chascun da la ses-



Il deputà Markus Clavadetscher (pld Tumleastga) ha pudì persvader la regenza grischuna pertutgant ils sviluppaders regionalis.

MAD

siun dal cussegl grond da l'october passà. El e ses cunsegnaders han pretendi da la regenza da desister dal sistem fix e da crear in concept per in svilup regional pli flexibel.

Dapli autonomia per las regiuns

Markus Clavadetscher ha pretendi en sia istanza che las regiuns duajan decider sezzas co ellas veglian proceder cun ils meds a disposiziun per il svilup regional. I stoppia esser pussaivel entaifer

quel nov concept da stgaffir plazzas parzialas per ils sviluppaders regionalis. Regiuns e vischnancas che veglian lavurar cun quel nov concept sajan da tractar egual sco las ulteriuras regiuns. Argumentà sias pretensiuns ha il deputà cun citar la lescha federala davart la politica regionala che pretendia da resguardar enten definir las regiuns ils lioms geografics, la funcziunalitad economica e la finamira communabla da schliar problems. La premissa da stgaffir plazzas a temp cumplain sur l'intschess da pliras regiuns na possia betg ademplir quellas pretensiuns, ha scrit Markus Clavadetscher en sia incumbensa adressada a la regenza grischuna. En la risposta scriva la regenza dad esser pronta da contribuir en l'avegnir als custs da personal da constructs organisatorics dal svilup regional nua ch'in sviluppader regional saja engaschà a temp da lavur parzial. Dentant sut il timun dad in sviluppader regional en piazza cumplaina. La regenza quinta uschia da pudair resguardar ils basegns da las regiuns e tuttina segirar in svilup regional professional che pussibilescha era da recrutar personal qualificat per las regiuns periferas dal chantun e vinavant resguardar las premissas federalas pertutgant il svilup regional. En quel senn ha la regenza scrit dad esser pronta dad acceptar l'incumbensa Clavadetscher.